

noch zů gewer, des / Bystums vnd siner geslozzen Lassen kómen, noch im dhain huldigung gehorsam oder swern, tůn wellen oder sullen, denn er hab vor, zu glicher wise, als wir, mit sinen briefen Vnd sinen liplichem / Ayd vernúwet vnd vollen bestétiget, gen vnserr obgenanten herschafft von **Österrich** vnd von **Tyrol** ze halten gẽczlich vnd getrůwlich, alle vnd yekliche pũnde vnd Artikel, die oben geschriben stand. / Darczů vernúwen vnd bestetten wir ouch wizzentlich mit dem brief, fur vns vnd all vnser nachkómen an Vnserm goczhus, Bischof Vnd Capitel daselbs, All ander Bůntnuss verphlichtung, hantuest Vnd / briefe, die von vnsern voruordern Bisschofen ze **Chur**, oder ir dheimem, mit der herschafft von **Tyrol** ze halden, gemacht sind, Sunderlich vnd mit namen, Vmb die **Vest ze furstemburg**<sup>12</sup>, oder wie die Ver- / -phlichtung genant sy. Vnd geloben wir obgenanten, Bisschof Capitel Stat Dienstman vnd lůte gemeinlich, als wir oben begriffen sin, Alle, vnd vnser yeklicher, alz im gepũret, Alle vnd yekliche obgeschri- / -ben Artikel vnd pũnde, ewiglich vnd vnwiderrůfflich ze halten vnd gẽczlich ze Volfũrend, an all vzzůg abred vnd widerred, by vnsern eren Vnd trůwen, Vnd bi den Ayden, die wir fur Vns vnd all / vnser nachkómen vnd erben, liplich darumb geschworen haben zu den Heyligen, Vnd dawider nyemer tůn noch schaffen ze tůnd, mit worten oder werken, heimlich oder offenlich in dheine wis. Dagegen, / hat der egenant vnser gnẽdiger herr herczog- **Albrecht**<sup>6</sup> als der elter herczog ze **Österrich**, fur sich selb, Vnd sine obgenanten Vettern Vnd ire gebrůder, der vollen gewalt er hat, Vnd fur all ir erben. Vns alle, / als wir oben benant sin, vnd vnser Goczhus, in Jr, Vnd aller irer erben vnd nachkómen, sunder gnad vnd scherm genomen, Vnd sich herwider Verphlichtet, Vns, by allen Vnsern Rechten, freyheiten, / Vnd lóbblichen gůten gewonheiten, ewiglich zu halten schirmen Vnd hant- haben, gnẽdiclich vnd vesticlich gen mẽniclich, nach lutt siner briefe, die er Vns darůber geben hat. Vnd des ze offem Vrkund, / Vnd ganczer ewiger stẽtigkeit So haben wir egenanter Bischof **Hartman**<sup>1</sup>, Vnser Jnsigel, Vnd wir der Tůmbrobst, der Tegan Vnd das Capitel gemeinlich, vnser Capitel Jnsigel, Vnd wir der Amman / der Rat, Vnd die Stat gemeinlich ze **Chur**, vnserer Stat Jnsigel, Vnd wir die egenanten Tellr, **Jm Engdin**<sup>2</sup> vnd im **Brigáll**<sup>3</sup>, vnserer Commun Jnsigeln gehenkt an den brief. So haben wir **friderich** von / **Jufalt** Vnd **Hans** von **Marmles**, fur Vns, Vnd ander des Goczhus Dienstlůte, ouch vnser Jnsigel, gehenkt an disenn offnen brief.